

INFORMACIJA

o provedbi Revidirane evropske socijalne povelje u Bosni i Hercegovini po Grupi 1 prava

Bosna i Hercegovina je ratifikovala Revidiranu evropsku socijalnu povelju 07.10.2008. godine, kao 40.-ta država Vijeća Evrope. Povelju države članice mogu prihvatiti sa rezervacijama, što znači da je ne moraju ratificirati u cjelosti, već ratifikovati one članove za koje stručnjaci iz Vijeća Evrope i državnih institucija procijene da, prema važećem zakonodavstvu, imaju realnu mogućnost implementacije.

Bosna i Hercegovina je do sada ratifikovala članove Povelje iz četiri tematske skupine prava, kako slijedi:

- grupa I – Zapošljavanje, obuke i jednake mogućnosti (članovi 1, 9 i 20);
- grupa II – Zdravlje, socijalna sigurnost i socijalna zaštita (članovi 11, 12, 13, 14 i 23);
- grupa III – Radna prava (članovi 2, 4, 5, 6, 21, 22 i 28); i
- grupa IV – Djeca, porodice i migranti (članovi 7, 8, 16 i 17).

U periodu od 2010. do 2023. godine, Ministarstvo za ljudska prava i izbjeglice Bosne i Hercegovine je sačinilo ukupno trinaest periodičnih izvještaja o implementaciji Revidirane evropske socijalne povelje, koordinirajući sa institucijama iz obje entitetske vlade i Brčko distrikta Bosne i Hercegovine, a koje imaju nadležnost u pogledu radnih i socijalnih prava u našoj zemlji.

Evropski komitet za socijalna prava (ESCR) i Vladin komitet Evropske socijalne povelje i Evropskog kodeksa socijalne zaštite (GC) su u septembru 2022. godine pokrenuli reformu procedure izvještavanja, a koja je okončana početkom 2024. godine. Prema novom načinu izvještavanja, ukinut je prethodni sistem referentnih perioda, dok su grupe prava klasificirane u dvije skupine, a ne u četiri kako je to do sada bilo. Dakle, Komitet za socijalna prava Vijeća Evrope od zemalja koje nisu prihvatile postupak kolektivnih tužbi, uključujući Bosnu i Hercegovinu, zahtijeva izvještaj svake dvije godine o implementaciji članova iz jedne od ukupno dvije grupe prava po Evropskoj socijalnoj povelji.¹ U tu svrhu definisan je ograničen broj ciljanih pitanja na koje svaka država članica treba odgovoriti u Izvještaju, a koji će zatim Komitet usvojiti. Države članice su u obavezi dostaviti Izvještaj do 31.12.2024. godine.

Slijedom navedenog, nakon dosadašnjeg obimnog sistema izvještavanja, Komitet za socijalna prava Vijeća Evrope od 2024. godine upućuje zemlje članice da dostave sažet i koncizan izvještaj isključivo prema ciljanim pitanjima, i u odnosu na postojeći zakonodavni okvir i statističke podatke koji su važeći u trenutku dostavljanja istog.

Ciljana pitanja za 2024. godinu su se odnosila na sljedeće oblasti: Pravo na pravične uslove rada; Pravo na pravičnu naknadu; Pravo na sindikalno organizovanje; Pravo na kolektivno pregovaranje i Pravo na jednake mogućnosti u zapošljavanju žena i muškaraca.

U cilju pribavljanja sveobuhvatnih odgovora na ciljana pitanja u ovom ciklusu izvještavanja, Ministarstvo za ljudska prava i izbjeglice Bosne i Hercegovine je koordiniralo sa institucijama sa svih nivoa vlasti, konkretno sa: Agencijom za ravnopravnost spolova BiH, Gender centrima Federacije i Republike Srpske; Federalnim ministarstvom rada i socijalne politike; nadležnim

¹ Prva grupa prava: članovi 1; 2; 3; 4; 5; 6; 8; 9; 10; 18; 19; 20; 21; 22; 24; 25; 28 i 29.

Druga grupa prava: članovi: 7; 11; 12; 13; 14; 15; 16; 17; 23; 26; 27; 30 i 31.

institucijama pri Vladi Republike Srpske zbirno putem Ministarstva za evropske integracije i međunarodnu saradnju Republike Srpske, te sa nadležnim institucijama pri Vladi Brčko distrikta Bosne i Hercegovine.

Institucije su poslale ažurirane informacije i odgovore na pitanja, u cilju informisanja Komiteta za socijalna prava Vijeća Evrope o provedbi Revidirane evropske socijalne povelje u Bosni i Hercegovini, a koje se zbog obima i lakše preglednosti njihove realizacije nalaze u Prilogu 1 uz ovu Informaciju.

U skladu sa naprijed navedenim, predlažemo da Vijeće ministara BiH donese sljedeće

ZAKLJUČKE

1. Vijeće ministara Bosne i Hercegovine je usvojilo Informaciju o provedbi Revidirane evropske socijalne povelje u Bosni i Hercegovini po Grupi 1 prava sa prilogom 1 – Odgovorima institucija u Bosni i Hercegovini na pitanja Komiteta za socijalna prava Vijeća Evrope o provedbi Grupe 1 prava Revidirane evropske socijalne povelje.
2. Zadužuje se Ministarstvo za ljudska prava i izbjeglice Bosne i Hercegovine da Informaciju o provedbi Revidirane evropske socijalne povelje u Bosni i Hercegovini po Grupi 1 prava sa prilogom 1 – Odgovorima institucija u Bosni i Hercegovini na pitanja Komiteta za socijalna prava Vijeća Evrope o provedbi Grupe 1 prava Revidirane evropske socijalne povelje, putem Ministarstva vanjskih poslova Bosne i Hercegovine, dostavi Komitetu za socijalna prava Vijeća Evrope u Strasbourgu i Udruženjima poslodavaca i sindikata u Bosni i Hercegovini, u skladu sa članovima 21. i 23. Evropske socijalne povelje, po usvajanju iste na sjednici Vijeća ministara Bosne i Hercegovine.